

歷代 日記叢鈔

學苑出版社

歷代日記叢鈔

第一一六冊

日記叢鈔

三

州

日

記

光緒丙午冬
月后印于滬

三洲日記序

南海尙書張公嘗奉使美利加日斯巴彌亞祕魯三國
舟車之所經耳目之所及逐日筆記始於光緒丙戌二
月迄於己丑十一月爲書八卷既奏

御矣命迺竹讎校付刊且敦序謹綴言曰昔春秋時列
侯爭雄長會盟聘煩行李往來爲命有辭見稱宣聖蓋
一言之得失而國之榮辱繫焉方今海禁宏開合環球
諸邦爲一大戰國通商互市內地雜居華人之謀生異
域亦無慮數十萬

朝廷軫念遐氓重聯與國妙選使臣其難其慎顧世之
猥瑣者恆昧於大體或稍通外洋語言文字遽翹然以
爲奇材而惟其儒術者則又一切鄙夷不屑徒爲放言
高論於險阻艱難情僞概未究心二者之蔽蓋交譏焉
尙書負閎通之材膺專對之任莅事伊始卽值美國驅
逐華工苛禁虐例層見疊出公反復辨論破其謀而折
其氣卒至洛士丙冷諸案收賠款鉅萬爲歷來辦洋務
之所無蓋公之信義素著而導窾批隙洞燭機要其操
縱緩急運用之妙豈猥瑣執固之徒之所能及哉韓子

曰學有經法通知時事公當之矣今觀此書於三國之山川物產政令風謠以及交際之宜有觸必錄不特後之往者流覽是編得所憑依卽未曾游歷者亦不啻問禁問俗蓋殫見洽聞之一也然公之所尤措意者則在乎日用倫常之道故於諄諭華人申動其忠愛任恤之心而於西俗之有近似於吾道者亦亟書之德義禮教固難概之彼族而忠信篤敬蠻貊可行公之運量於斯爲大此又豈庸俗人之見之所及哉至於偶然涉筆皆有妙趣公之餘事不足爲公重也光緒丙申夏五朝邑

閻迺竹謹序

月

夫玉帛之儀嫻則干戈戢矣詞令之文贍則猜嫌泯矣
春秋列國盟會實繁或陳書以修睦或賦詩以見志揖
讓而造宗社之福談笑而拯生靈之命肸嬰僑札麟經
遽焉然而承學之士跼步鄉曲墨守訓詁無裨鉅艱琴
書偃仰止於一畝之宮弋釣棲遲盡於三宿之戀求其
建旗大瀛秣駟絕域妙達時務動協機宜盱衡當代勝
任者鮮我

朝洋禁宏開

聖懷柔遠鷁落鰓部視道若咫關津財賦之藪水陸綰

轂之區蠓舍蝸房樓居相望由是皇華之選特重邦交
南海

樵老尙書含秀河緯作世霖楫括地繪象磨厓勒銘聚
米而如對狼胥奇情飈翥闢牖而欲窺烏弋壯志虹騫
九邊吹笳負越石之偉略萬里破浪乘宗慤之長風乙
酉六月奉

命出使美利加日斯巴彌亞祕魯三國丙戌二月展輪
西行遂歷歐洲亞墨諸島羊腓夜熟禹跡未至之墟烏
羽山齊周轍罕經之所敦槃和會冠佩雍容譽洽鄰封

輝增華夏交際之暇涉筆成錄天時寒燠山川夷險民俗雕樸物產盈耗以及中朝親故時寄牋繪異地官僚不乏談論凡有所觸例得備書庚寅節旋

上適咨詢公因奏對詳晰稱

旨仲夏五月始將日記編纂進呈有

詔留覽都中人士咸欲快覩爰取是帙檢付剗剗燃脂
瞑寫宜貴洛陽五色之箋枕祕遐探何減方朔十洲之
記以視鳧旌陰羽交閭但列其名露犬紈牛王會未述
其狀奇肱之車因風偶至長臂之服沿流得珍天馬蒲

一〇
荀罄搜牢於荒裔邛竹蒟醬殫物色於殊方轉覺前賢
輸茲閱覽然則登常山而獲寶符屯祈連而斷右臂強
弱翕張之數虛實避就之形是在讀者善會焉爾歲在
旃蒙協洽陬月漢川黃良輝謹序

蓋聞黃帝省方營衛周於萬國赤縣徧壤神皋外有九州然前史目不睹昆侖妄辨河源之誤長老足不出安息謬云日入匪遙博望鑿空財通大夏甘英臨海未達黎鞬況乎穹員不補之區大矩絕維之地晝夜相反人鬼乍分若士嘗其東西豎亥昧其南朔酋豪爭長建國蘄過乎百年琛賚相望慕義能通乎九譯我

聖清化覃幽顯政在懷柔王會之廷纘衣冠而數貢光國之使犯星宿而浮查光緒十有一年南海張樵野尙書奉

命出使美利加日斯巴彌亞秘魯三國宣德化固邦交
近代故事也公量隘區中智周象外練習邊事通三十
六國之情廣覽地形明八十一分之數是以張旌出境
有專對之才杖節殊庭稱膚使之選契丹騎屋觀許將
之威儀郭震立談得贊普之要領自謂此段使事厥難
有三約法平等損益在權外情向背伺我虛實黃龍清
酒秦昭念功之詞天馬蒲陶大宛畏威之貢漢家內治
迺班建始四條之書唐業中衰別立彝秦七年之策今
杖

國威信賓是遐荒頗無繒絮之齎饒有波濤之險留犁
撓血未寒白水之盟赤嶺樹碑尙守神龍之誓然言語
約束誼屬羈縻支拄歲月詎堪長久此一難也交廣市
舶前代已通江漢摧場今日殆遍呈表怪麗誨誘奇淫
玉卮無當金貨外泄帝女堙海木石有時而窮愚公移
山畚鍤仍世而具猶以西域本貪漢繒北人兼嗜酪奴
交易有無盈絀等比近者永徽蠶種賜入吐蕃顧渚茗
芽移栽捐篤資我絲苻日月寢微必令彼族自拔已植
之根株而訓齊人不貴難得之貨用此二難也李斯入

秦慮見斥逐張儀在楚辱及捶笞況乃邊鄙流庸依託
絕域龍支遺戶歲時私具唐衣馬流種人子孫自別漢
姓主旣畏其喧奪客又不能取容朝野同心議下一切
之令載書將改空以百口相爭此三難也因是三難乃
求五益自昔聞喜製圖旁探商胡之口銜之作記雜采
道俗之書山川險易經涂曲折跡匪躬履語焉不詳海
中思土舟子之言本誣國舊無人鬼市之名定誤而羊
腓候日窮北有不夜之天駝鳴知風極西有流沙之壤
平子銅龍遠知地動之向武鄉流馬近省糧運之勞聖

賢制器利人勢非得已不若偃師膠偶止導荒淫公輸
木鳶自嘗機巧者也彼宛渠造艦絕海沈行奇肱作車
陵颿飛駕亦思馬之新礮權輿火攻泥盤羅之激泉濫
觴水法匠心爭巧後出愈奇取彼所長致我有用是可
考工火浣入貢笑魏文之失言楛矢集庭病陳人之寡
識河南舞馬拜伏應聲海西幻人支解自屬袖長三丈
沃沮浮至之衣食受五升毗騫贈遺之器至乃兒搃樹
上羔生土中象齒若門鳥卵如甕沈沙棲陸之寶隱海
藏山之琛方國以之炫奇君子因而多識是可辨物公